

Governor Bhalla-i NLA session jazüker

Dimapur, February 2, 2026 (TYO): Nagaland Governor Ajay Kumar Bhalla-i March 2, 2026 nü assembly session alitsü ayongzükogo. Constitution of India nung

Arrla 174 nung Clause (1) ajanga tashi agüja aliba ama March 2, 2026 nü 14 buba Nagaland Legislative Assembly indang Tibuba Session alitsü ayonger ta Governor-i metetdaksüogo.

Assam sorkar mapa inyakertemi itasen jelia agitettsü

Guwahati, February 2, 2026 (Agencies): Assam Chief Minister Himanta Biswa Sarma-i Hombamü state sorkar mapa inyakertem asoshi kanga dang tongtipang osang ka metetdaksüogo.

Assam nung sorkar mapa inyakertemi 'need-based basis' nung parnok itasen jelia meshia agitsü akok ta CM Sarma-i ashi.

Lok Sewa Bhawan, Dispur nung Swagat Satirtha Portal 2.0 tenzükba sentong nung pai iba osang sangoktsü.

Iba inyakyim tasen kübok Assam sorkari parnok mapa inyakertemi 'advance salary' agitsü temelaba agütsür. Iba ya küm ka tsüngda 'single payment' mesüra 'installments' ajanga meyipa agütsütettsü.

Iba teyari agirtemi bank nung 'minimum interest' ka agütsütsüsa akümtsü ta Chief Minister-isa ashi.

Itasen account nung enoktsüba sülen jelia meshia aliba sen agütsüra interest tera dang agitsü, ajisüaka installment lemsar meyipa agütsüra interest tera teimba agitsü. Iba ya sorkar mapa

inyakertem senotsü rongdak nüngdak adokdang yaritsü asoshi lir ta CM Sarma-isa ashi.

Paisa financial year nung anaben Swagat Satirtha transfer portal lapoktsü nangzükba indang nenshidang sorkari March 31 matongdang employee transfers khen asütsü sentong aliba ashi.

Tesüiba nung iba portal ajanga sorkar mapa inyaker 9,000 shi ajangzükogo aser parnoki tanaben tenüng agütsütsü makok. Ajisüaka, iba maongka magishirtemi parnok inyaknüba tesem nung transfers asütsü atema tenüng agütsütsü akok ta CM Sarma-isa ashi.

Taoba portal ji January 1, 2025 nü lapok aser June 7, 2025 nung tembang. Tangbo sorkari March 7 matongdang transfer maparen ajak tembangnür ta paisa shisem.

Iba atema Election Commission nem osang agütsütsü kechiyong iba mapa ya political masü saka administrative indang lir. Sorkar mapa inyakertemi anogo 15 tsüngda applications renemtsü ayongzükur ta CM Sarma-isa ashi.

Manipur NDA MLA tem Delhi nung adenshir

Guwahati, February 2, 2026 (Agencies): Manipur nung President's rule benoka aliba taruba hopta tembangtsü aser ibaji masüidang nüngtugu sorkar ka akümtsü akok asü makok ta jembiba mapang ka Manipur nungi National Democratic Alliance (NDA) MLA tem Delhi nung adenshiba osang angazükur.

Bharatiya Janata Party (BJP) indang central leadership-i jaokba sülen Deobar nungi Manipur MLA tem Delhi-i aotsü tenzük.

Deobar aonung tashi nung Manipur MLA 20 jungnüa Delhi atong aser ano February 2 nü parnok kar oa tongogo ta osang angazükur.

Manipur nung President's rule tanabuba shilem tembangtsü anogo ishika dang liasü BJP central leadership-i iba senden ayonga amener.

Manipur nung kin o kin tsüngda rarayonga aruba manenba agi February 13, 2025 nü President's rule benoka liasü aser ibaji August 2025 nung ano ita trok atema atsülanga liasü.

Tang Delhi nung oa alir rongnung taoba chief minister N Biren Singh, Assembly Speaker Satyabrata Singh aser taoba minister Y Khemchand Singh nunger dena lir.

Tesüiba nung BJP central leadership-i Meitei aser Kuki nunger MLA tem aser National

People's Party (NPP) aser Naga People's Front (NPF) dena alliance partners aser Independent MLA tem den sendentem balala menogo.

December 14, 2025 nü BJP national general secretary (organisation) B L Santhosh aser BJP Northeast coordinator Sambit Patra nati Delhi nung Meitei aser Kuki BJP MLA tem dena ajurutepa senden amen.

Ajisüaka, tetsükdaktsü tulutibaji Kuki nunger BJP MLA temi taruba sorkar nung adentsü menangzükba lir. Par nübortemi sorkar nung madentsü rongshir ta MLA temi ashir.

Kuki nungeri Centre dang Union Territory with a legislature ka meshir aser iba atema tenangzükba agüjang ta parnoki noktaker.

Taruba hopta ishika tsüngda sorkar mekümla Centre-i tanga tagidak Budget Session mapang Parliament nung statutory resolution ka benoktsüsa akümtsü aser iba ya President's rule atsülangtsü atema asütsü.

President's rule benokba sülen Governor Ajay Kumar Bhalla-i tensa süngjemdaksütsü atema mapa balala inyaka arudar aser iba nung security forces ket nungi auyazüka bener aruba prangpongtem meyipa agütsütsüba tetuyuba dena lir.

Arts, music & literature atema Governor's Award 2025 agütsüogo



February 2, 2026 nü Dr. Imkongliba Ao Hall, Lok Bhavan, Kohima nung Nagaland Governor Ajay Kumar Bhalla den Governor's Award 2025 angurtem külemi agiba noksa ka angur.

Kohima, February 2, 2026 (TYO): February 2, 2026 nü Dr. Imkongliba Ao Hall, Lok Bhavan, Kohima nung Arts, Music aser Literature atema Governor's Award 2025 agütsüogo.

Chief Minister Neiphiu Rio, MLA tem, sorkar tongti ketdangsürtem aser tangartem lia Nagaland Governor Shri Ajay Kumar Bhalla-i sempettem agütsü.

2025 atema Governor's Award angurtemji Mannyei Konyak (Arts - Sculpture and Woodwork), Guru Rarenbenba (Arts - Performing Arts), Colored Keys (Music), Moko Koza (Music), aser Vishü Rita Krocha (Literature) nunger lir.

"Governor's Award ajanga Nagaland nung purapitetba sempet, sobaliba tera ayangba aser shisatetba indang benjunger. Arts, music aser literature ya

nübortem indang tanüla lir aser item ya Nagaland nung inyangsangshi, benjungtem, kentem, tsüngsangtem aser otsütem nung densema lir" ta Governor Ajay Kumar Bhalla-i ashi.

"Melenshiba lima ka nung artists, musicians aser writers-i senmang kümzüka ayuba nung tongti shilem agir. Parnoki purapitettem ama sobaliba aser tanü putu tsüngda apu alar. Iba sempet angurtemi tashi angaba, pei sasa purapitetba aser bendanga agütsüba atema tenüngsang agütsür. Parnoki sempet agizükba ya nija atema dang masü saka state atema konang aser lanuputu ajungmesor" ta Governor Bhalla-isa ashi.

"Artists aser scholars-i lisopur tangatetba, tar nunger otsü, tebang agi jembia aruba aser

samaa aotsü ana nung aliba oshitem kaket küma züluba atema tenüngsang agütsür. Rejutem, sorkar department aser civil society-i item sempet aketeritem anitetang aser parnok asoshi sabang peria agüjang" ta Governor-isa metetdaksü.

"Nagaland sorkari cultural preservation aser creative industries ajungkettsü atema mapa balala inyaka arudar. Iba ajanga maittsü akangshiba dang masü saka taküm lia aotsüsa rongsen ajangzükur aser national aser international levels nung Nagaland state tetshir" ta paisa ashi.

"Governor's Award ya 2003 nungi agütsütsü tenzük aser tanü iba ya Nagaland nung tongtipangtiba sempet ka kümogo" ta Secretary Art and Culture Bodeno S. Colo-ia o jembidang ashi.

Congress-i NE senzüka yutsü: Sarbananda Sonowal

Guwahati, February 2, 2026 (Agencies): "Taoba Congress sorkartem nung ochimashi liasü aser mejungi ketdangsübaren mapa inyak anungji BJP aitsüba anener 2047 tashi nung India renloksü alizüng atongtsüba nung yariteptsü ayongzükur" ta Union minister Sarbananda Sonowal-i Congress dang ashi.

Lok Sabha nung President Droupadi Murmu onük atema tepela agütsüba motion benokdang Ports, Shipping and Waterways minister Sonowal-i iba ya ashi.

"Congress-i BJP anema noktakba aser sempaba agentsüla aser 2047 tashi nung Viksit Bharat akümtsüba nung Prime Minister Narendra Modi den külemi inyaksüla" ta pai ashi.

Sonowal ya Assam kübok

Dibrugarh nungi MP lir aser pai ashiba agi Northeast nung alirtemi Congress magizükur.

"Congress-i Northeast senzüka yutsüba agi nübortemi parnok sendokogo aser election nung parnok asentenshitsü teimla tera dang lir. India nung mezüngbuba prime minister Jawaharlal Nehru-i 1962 küm China-i atsünga arudang Northeast den pila" ta Sonowal-isa metetdaksü.

"Taoba Congress sorkartemi ochimashi kanga inyak aser 2G spectrum, coal block allocations, CWG amala ashishitep ken o tem kanga adok. Tangbo Prime Minister Narendra Modi lenisüba kübok tashishitsü maliba, timi inyangsangshiba aser ochimashi maliba sorkar ka nenoki angur" ta paisa ashi.

"Congress-i küm aika Northeast nung yimsü süa arudang terenlok bentsür maru. Northeast nung alirtemi yimdong nung lungkak ait nung ang langka ka angu. Northeast nung terenlok mapatong shia atema onoki lungkak aitsüsa aküm. Modi-i Northeast renloksü atema temulung agüja inyakba atema pa Northeast nung kanga nüngtugu lennir ka kümogo" ta Sonowal-isa metetdaksü.

"Northeast nungeri nenok ya külem nisungtem ama mezüngshir. Nenoki Northeast nungi auyaogo, nenoki nübortem takhangba magütsü. Northeast nung election shia nenok magizüktsü. Anungji nenoki merangba ya amajok dang" ta Sonowal-isa Congress züngsemtem dang ashi.

WCH-i CABA züngsemtem mang ayimer; Asükhu lemsar

Dimapur, February 2, 2026 (TYO): January 31, 2026 nü 10th Mile Road, Kohima nung gari lendong nung Chümoukedima Ao Baptist Arogo (CABA) nung tetsür züngsem pungu asüba atema temulung raksar ta Western Chakhesang Hoho (WCH)-i ashi.

Iba lendong atema tasür kibongtem aser CABA arogopur

dang masü saka Naga nunger ajunga temulung raksar aser mangyimer ta parnoki ashi.

"Onoki tasür kinungertem, CABA, arogo lennirtem, Ao civil society teloktem aser Aor ajak den asükhu lemsateper. Kodanga memelenzükettetsüsa takoksa anguba atema o tashitsü kecha mali, talisa tetsürtemji arogo aser

loktiliba nung tamang, tenzükba aser tashi liasü" ta Western Chakhesang Hoho-isa metetdaksü.

Tulusang Tsüngremi tasür kibongtem nem Pa tesünep agütsütsü aser yirua alirtem nem anisüngzük, tashi aser taneptsü agüjang ta onoki sarasademer ta parnokisa ashi.

Nagaland Angh Ajay Kumar Bhalla-i Dimapur semdang



Nagaland Angh Ajay Kumar Bhalla-i Ruins of Medieval Kachari Kingdom, Dimapur semdangba mapang ketdangsürtem den jembidang tangokba noksa nung angur.

Dimapur, Tsüklai/February 02 (TYO): Manipur aser Nagaland Angh, Ajay Kumar Bhalla aser pa kinungtsü Jyoti Bhalla, tenati January 31, 2026 nü Dimapur semdanga liasü.

Iba mapang Angh-i Gurudwara Marwari Patti,

Dimapur semdanga Ardas aser Samapti agia liasü aser iba sülen S. Jaspal Singh, Joint Secretary, GPC ajanga pela agizükba o jembi.

Angh nem tenüngsang agütsüba sülen sarasadem aser Guru Ka Langar agia sentong

tembang.

Kasa anogo pai Ruins of Medieval Kachari Kingdom semdanga liasü. Ajisür pa chiyongtsü atema Niathu Resort bushia ao aser RMS nung sentong ka nung shilem agia liasü.

KVK Dimapur nung regional conference ayongzük

Dimapur, Tsüklai/February 02 (TYO): Hombarnü Krishi Vigyan Kendra (KVK), Dimapur nung natural farming for CRPs, Krishi Sakhis aser extension functionaries atema anogo ka regional conference ayongzüka liasü.

Iba sentong ya Regional Centre for Organic & Natural Farming (RCNF), Imphal ajanga KVK, Dimapur den lungjem ayongzüka liasü.

Sentong tenzüka Dr. Homeswar Kalita, Head of Regional Centre, Nagaland ajanga jembi.

Dr. VY Deoghare, Regional Director I/C, RCONF Imphal ajanga iba sentong ayongzükba

indang lemsatepdang sustainable agriculture aser aluyimer ajangzüksü atema natural farming ya tongtipang lir ta ashi.

Sentong akhumdong ama Rosemary Ezung, Joint Director, Agriculture and Nodal Officer, NMNF Nagaland aser Bodevi Suva, Director, SAMETI Nagaland dena liasü.

Technical session mapang 'Promotion of natural farming schemes', 'Practical approaches to natural farming', 'Techniques to enhance farmers' income through reduction of input costs', aser 'Nutrient and pest management practices' onüktem nungi jembi liasü.

Technical sessions nungya

'Natural farming certification systems' aser 'Marketing and branding of natural produce' nunga rangloker jembi liasü.

Iba sülen sensaksemba mapang nung aluyimer aser takotet nisungtem tsünga shisa lemsatepa liasü.

Tatembang sentong nung shilem agirtem nungi mangatetba balala asüngdangtep, farmers' honour agi aser Dr. Narendra Chaudhari, Junior Scientific Officer, RCONF Imphal ajanga melepzüng o jembi.

Iba sentong nung RCONF Imphal aser KVK Dimapur nungi shisalen sayurtem liasü, kong nisung 100 shi aden.

Desi Rewind-i Fusion of Bands - Season 3 takok nguogo



Dimapur, Tsüklai/February 02 (TYO): Fusion of Bands - Season-3 Grand Finale takok ngua January 31, 2026 nü Bhagat Stadium, Rangapahar Military Station, Dimapur nung liogo, kong Nagaland nungi kententsü sempet aser telungjem sayua liasü.

Iba sentong ya Indian Army indang Spear Corps ajanga ayongzük, koba lanurtem, sobaliba aser national integration ajungkettsü asoshi Operation Sabdhavan kübok sentong ka lir.

Iba sentong nung tongti tesemdang ama Manipur aser Nagaland Angh Ajay Kumar Bhalla den Lt Gen Abhijit S

Pendharkar, General Officer Commanding Spear Corps aser Nagaland indang taoba chief minister aser Angh, Dr. SC Jamir dena liasü.

Final nung district balala nungi kentener telok trok-i toktepa liasü - fter Party (Dimapur), NTTB - Nikato Tamang and the Band (Dimapur), The Muse (Mokokchung), Rock Revolt (Dimapur), Jack in the Box (Dimapur) aser Desi Rewind (Mokokchung).

Iba mapang Desi Rewind (Mokokchung)-i tajungba shilem agia tematiba jenjang nguteta senpet sen 3.5 lakh bener ao.

Dimapur nungi Jack in the Box-i tanabuba jenjang nguteta senpet sen 2.5 lakh angu aser Dimapur nungisa NTTB - Nikato Tamang and the Band-i tasembuba jenjang nguteta senpet sen 1.5 lakh agizüka liasü.

Iba den finalist shia nem sen 30,000 aser semi-finalists shia nem senpet sen 5,000 agüja liasü.

Iba tetoktepba nung Akum Jamir, Bethel Tsuzu aser Arenlong nungertem tetendanger liasü. Iba sentong nung guest artist ama Agukath, Ahio Khieya aser Mahila Police Band nungia shilem agia sentong tali lemladaksü.

East Dimapur Town Council ajanga metetdaksür

Dimapur, Tsüklai/February 02 (TYO): Nagaland Municipal Act, 2023 kübok özüng nung shia aliba ama, lokti tentet, sorkar departments, private agencies aser nisung ajunga dang East Dimapur Town Council (EDTC) tashi küboki aiter, ta EDTC sangdong ka ajanga ashi.

Hoardings, banners, posters, kiosks, digital displays aser public advertisements balala densema advertisements dak sendakba temelaba, özüng, azüokba aser mapa kuma inyakba ajak Municipal Act, 2023 nung shia

aliba ama East Dimapur Town Council-i alena lir.

Advertisement rules, procedures, permissions mesüra jurisdiction dak sendakba nung mangmangba, rataba mesüra mangatettep lira, item kija, lokti mesüra sorkar department temi jangjateptsü aser nüngdakba lenmang sayutsü asoshi office lapoka aliba mapang Office of the East Dimapur Town Council bushia arutsü ayongzük.

Ozüng agi melaba ama East Dimapur Town telungzük nung advertisements shidak amshitsü asoshi nüburtem dang amalitep akatsü ajungshir, ta EDTC sangdong ajangasa ashi.

Tseminyu nung Anti-rabies vaccination campaign ayongzük



Tseminyu nung February 2, 2026 nü anti-rabies vaccination campaign agiba mapang tangokba noksa nung angur.

Dimapur, Tsüklai/February 02 (TYO): Rabies nungi kumzüka alitsü aser nüburtem iba tashidak nungi kumzüka ayutsü nükjidong nung Office of the Chief Veterinary Officer, Department of Animal Husbandry & Veterinary Services, Tseminyu ajanga angati anti-rabies vaccination campaign sentong ka February 2, 2026 nü Tseminyu nung Rengma Students' Union office

telungzük nung ayongzüka liasü.

Iba campaign ya ASCAD 2024-25 kübok ayongzük, koba 2025-2026 mapang inyaker. Iba campaign mapang azü 145 nem angati vaccine agüja liasü.

Iba angati anti-rabies vaccination campaign ya Dr. Gwathonlo Tsela, Veterinary Assistant Surgeon, Tseminyu aser par teloki ketdangsüa agia liasü.

State nung Assam Rifles-i sentong balala ayongzük

Dimapur, Tsüklai/February 02 (TYO): Indian Army indang Spear Corps kübok Assam Rifles temi Op Sadbhavana project kübok yangluba Community Hall taen ka Old Tesen Village, Peren nübur nem agüja liasü.

Yimdak-yimtsüng nung ki o jen tashi itshitsü aser nüburtem takum yimya tajungba kumdahtsütsü nükjidong nung iba mera ya agia liasü. Iba building tasenba ya yimdaklir asoshi tongtipang ki o jen ka ama asütsü, kong lokti senden aser sentong balala ayongzüka agitettüsü.

Iba den külemi iba hall nungya tanurtem sentong balala, sobaliba sentong ayongzükettüsü, koba ajanga yimtsüng nung tanurtem terenlok nunga shilem agitsü.

Iba ama ki o jen aliba ajanga nüburtem sentong balala nung timbai shilem agitsü ajungmesotsü aser telungjem adokdaksütsü.

Old Tesen Village nung

alirtemia Assam Rifles dang iba ama ki o jen agütsüba asoshi pelaba lemsatepa liasü. Iba ki agütsüba sentong nung Old Tesen Village nungi nisung 90 shi dena liasü.

Ano Assam Rifles temi Tsutoho village, Zuhneboto district nung aliba Mt Chingkhü Hostel asoshi chiyongtsü aser anogoshi nüngdakba osettsüset agütsüba sentong ka ayongzüka liasü.

Tepetzük tia nung aliba tanurtem yaritsü nükjidong nung iba sentong ya ayongzük. Sentong nung Assam Rifles temi chiyongtsü balala den jang, pulses, cooking oil, hygiene products aser anogoshia amshiba osettsüset agüja liasü.

Iba sentong nung sepaitemi tanurtem den sensaksemba mapang agia kati ka ajungmesotepa liasü. Mt Chingkhü Hostel ketdangsür temia Assam Rifles dang mapa tajung inyakba atema pelaba lemsatepa liasü.

India-i Palestine maneni nongittsü: PM Modi



Palestinian Foreign Minister Varsen Aghabekian aser PM Narendra Modi

New Delhi, Tsüklai/February 2 (Agencies): PM Narendra Modi-i Palestinian foreign minister, Varsen Aghabekian den ajurutep aser India-i Palestine nungertem maneni nongittsü ta ashiba den, Gaza yimjung atema sentongtem densema tang yimjung asoshi sensaksem balala pelashishia agizükogo.

Aghabekian ya Arab linüktem nungi India semdangba foreign minister tem rongnung densema liasü. Parnok ya tanabuba India-Arab Foreign Ministers' senden atema India-i arua lir. Senden nung external affairs minister S Jaishankar-i, kiralongrartemi tenük yokba linüktem peisasa defend asütsü

temeden lir ta ashi. Ketdangsürtem sangdong ka ajanga ashiba agi, yimjung aser tesunep atema Arab League-i tongtibang shilem agiba atema Modi-i parnok nem tenüngsang agüja liasü. Gaza nung nüburtem timtem tekangshi tulu nung aliba indang metetdaksüba mapang Palestine nunger minister yagi Modi dang, international temzüng ozüng kübok Palestine nunger temeden India-i pusemba ya kanga senti süa agir ta ashi. External affairs ministry-i ashiba agi, PM-i, taruba kümtem tsüngda India-Arab partnership nükla indang lemsatep aser shishilemba, investment, energy, technology, healthcare aser tanga tongtibang lenlatem nung tesendaktep akangshitsü atema India bendanga agütsür aliba metetdakja liasü. Foreign ministers tem senden nung Jaishankar-i arrtsü adena kiralongrartem inyakyim indang ajang ajanga jembi aser ashiba agi, iba ya agizüktsü tamakoktsü, kechiyong iba ya international relations aser diplomacy tamendakdak anema lir. Paisa, Arab foreign minister tem dang, kiralongrartemi tenük yokba loktitem parnoksasa defend asütsü temeden lir aser iba temeden ya benshitsü ta ashi.

Rahul Gandhi-i MM Naravane memoir indang jangjashitsü



New Delhi, Tsüklai/February 2 (Agencies): Lok Sabha nung opposition lenir Rahul Gandhi-i Hombarnü, 2020 küm China arrtsü nung mepetmesü adokba sorkari achaayangba dak sendakba nung pai jemibiba indang jangjashitsüogo. Lok Sabha nung iba ajanga mepetmesü adoka liasü. Rae Bareilly MP yagi ashiba agi, pai jemibiba olen ya taoba Army Chief indang tebilemba liasü. Pai Gen (retd) M M

Naravane aser pa indang memoir indang jembirba liasü, koba tang tashi madoki lir. "Iba ya ni masü saka taoba Army Chief-i kati kaket nung zülu aliba indang lir," ta Gandhi-i ashi. Rahul Gandhi-isa, iba kaket ya publish asütsü memelar ta ashi. "Parnoki kechiba Army tekolakba indang tebilemba ida tsübur? Army tekolakbai pa tebilemba lemsatepba kechiba

ita tsübur," ta paisa shisem. Hombarnü Gandhi-i 2020 küm China arrtsü nung mangatettep adokba sorkari achaayangba dak sendakba nung manuscript ka dak ajemdaker magazine report ka aiben benoktsü merangba sülen Lok Sabha nung mepetmesü adoka liasü. Iba sülen Union ministers Rajnath Singh, Amit Shah aser tanga BJP lenirtemi House anisatsü merangba atema Gandhi aija liasü. Sorkai kechiba iba kaket ya tsübur ta asüngdangba mapang Gandhi-i ashiba agi, iba kaket nung Ato Kilonser aser Defence Minister Rajnath Singh na indanga zülusema lir. Rahul-isa, iba kaket yagi Army indang aser parnok ya linük yimden yimsüsürtemi koda tamakok ngudaktsü iba indang metetdaksütsü ta ashi. Congress lenir ygi ashiba agi, taoba Army tekolakba M M Naravane-i pa indang kaket nung Ato Kilonser Narendra Modi aser Defence Minister Rajnath Singh na indang jangja jangja zülua lir ta ashi. Gandhi-isa, kaket ya adokdaksüra Narendra Modi aser Rajnath Singh na ya chichiba nung kechi aji jangja akümstsü ta tsübuba agi sorkari pa nem mejembidaktsür ta ashi.

Gen-Z tem rongmesotsü merangba atema Centre-i Wangchuk aitsü

New Delhi, Tsüklai/February 2 (Agencies): Bangladesh aser Nepal nung ama Ladakh nunga Gen Z purtem nem longkak aitdaksütsü merangba atema Centre-i Hombarnjü tepuokdak yua aliba Ladakh activist Sonam Wangchuk aitsüogo. National Security Act (NSA) kübok Wangchuk tepuokdak ayuba dak sendakba nung Supreme Court nung ken o angadangba mapang Solicitor General Tushar Mehta-i, pa ya temzüng ozüng kübok sota yuogo aser pa inyakyim ya "secessionist" inyakyim den kasa lir, ta ashi. "Ni kü taküm bendanga agütsütsü mulunga lir. Ni ibaji meyipa agitsü atema angema malutsü.. küm anema FIR ka benok nunga kecha asütsü.. Bangladesh aser Sri Lanka nungertemi temelenshi bener aruogo," ta Wangchuk-i ashiba Mehta-i lephsia metetdaksü. "DM atema item ojang asemji teperi. Nai Gandhiji tenüng amshitetsü akok, saka nai Nepal aser Bangladesh nung tatalokba ama atalokdaksüner.. Pai Ladakh ya Nepal aser Bangladesh ama kümdaktsüner," ta Mehta-i ashi. Wangchuk-i yokyatsüyar kati pei tema nung mi senoka arongba indang jembi koba ajanga 2011

Arab Spring tenzükdakja liasü, ta paisa shisem. "Iba amai pai Gen-Z pur nem inyakdaksüner," ta Mehta-i Supreme Court dang ashi. Justices Aravind Kumar aser Prasanna B Varale nati kümteba Supreme Court bench-i, NSA kübok climate activist Sonam Wangchuk tepuokdak ayuba atema ken o ashishiba angadangdar. Iba ken o ya ano Mongolbarnüa angadangtsü. Sonam Wangchuk kinungtsü Gitanjali Angmo tenüng nung nokdakba advocate Kapil Sibal-i ashiba agi, FIR tejen dak ajemdaker detention order ya agüja liasü. Paisa, Wangchuk sota ayurtemi video shilem kar kar dang agizüka pa anema ken o benoka liasü, ta ashi. Sibal-isa, Wangchuk-i Hindu nunger tsüngremtem anema jembi ta shia pai aitsür aliba ya magizük. Wangchuk ya 2025 küm September 26 nü apu aser iba sülen Jodhpur-i anir ao. Ladakh nung statehood aser Sixth Schedule jenjang khanga longkak aitba sülen anogo ana lir pa pua liasü. Longkak aitba mapang nisung pezü asü aser 90 yirua liasü. Azütokshi lendong ataloktsüsa rongshiba atema centre-i pa aitsü.

SIR senden amenba sülen Mamata-i EC tekolakba aitsü



New Delhi, Tsüklai/February 2 (Agencies): West Bengal chief minister Mamata Banerjee-i Hombarnü Chief Election Commissioner (CEC) Gyanesh Kumar aitsüogo aser Election Commission headquarters nung pa den ajurutepba sülen pa ya asüküm nisung ka aser teyazü jembir ka ta ashi. West Bengal nung tang Special Intensive Revision (SIR) agia aliba mapang iba senden menogo. SIR inyakyim ya tejak repranga inyakba inyakyim ka aser lokti kar anema inyakshangshiba ka lir, ta Banerjee aser lar party-i shia arudar. Election Commission office nungi adokba sülen Banerjee-i, "ni kanga jashir. ni Delhi nung politics nung mapang talangka shilem agia arudar. Ni pezüben tashi minister liasü aser MP tenetben tashi liasü. Ni iba amala Election Commissioner kodanga mongudangka, shiba kanga asükümer aser teyazü jembir ka lir. Ni pa dang ni nü menden akümstsübur, kechiyong meden

kecha shinga asoshi teti masü ta shiogo. Künübo nai iba menden toktsütsü... Kechiba Bengal dak tenük yoka inyaker. Election ya democracy nung benjung ka lir, saka nai nisung lakh 58 indang tenüng entoktsü aser parnoksasa iba anema nokdaksü asoshi temelaba magütsü," ta ashi. Banerjee ya Trinamool Congress züngsem 15 aser SIR inyakyim agi kongshir aliba kibongtem den Deobarnü Delhi atong. Lenirtem rongnung party MP Abhishek Banerjee aser Kalyan Banerjee nata densema liasü. Laisa, la osangbenertem den sensaksem agitsü aliba tesem Banga Bhawan kimai police aika yokba aitsüogo aser iba amala amokmeren ya anentsüla ta shia liasü. Special Intensive Revision ya tang state 12 aser union territory tem nung benoka inyakdar aser February 7 nü tatembangbuba electoral rolls sayatsü lateter lir.



TIR YIMYIM YIMOBILEM (EDITRIAL)

DIMAPUR TUESDAY, FEBRUARY (TSÜKLAI) 03, 2026

Senotsü sentong

Asenok Khristan-tem asoshibo meshitak saka kudasütsü ? Hindu nunger teimba alidak lima nung Hindu nunger yimsüsürtemi tanga tamangba yimsütem mezüngshii par yimsüleni atsürji, yimten sentong nungbo ma ta meshitet anidaktsüsa akümer, anungji taküm 2026-2027 küm asoshi linük senotsü sentong benokba tatar senden yakanü amongnü mena, jabilee kilonser Wt.Nirmala Sitharaman-i iba küm linük nung sen crore lakh 50 shi endoka nübortem asoshi maparen tapu balala inyaksü asoshi senotsü sentong ka benogo. Iba senotsü sentong nung temulung agüja inyaksüba mapatemji aluyimba aser ali nungi anguba totzü mamshii electric tashi amshia inyakba mapa nung temulung agütsütsü asoshi senotsü aika lezmüksüba den ano electronic osettem aser electric tashi agi jajaba garitem jenjang dalangba kümdaktsüogo. Atangji, küm shia linük nung nübortem asoshi senotsü sentong yangluba apia temeteteremibo pei pei akok mapa inyaksü meranger. Aji oda, senotsü tasenba sentong nung osettsüset aser chiyongtsü koba nungsa jenjang atur, itemji akok tashi malitsü saka ayoktsü meranger aser ano koba nungsa jenjang ajemer, itemji alitsü meranger. Kasaji, koba maparentem nungsa senotsü teimba lezmüka ali aser koba mapatem nungsa temulung tagütsüba agütsütsü lateta ali, item mapatem nungji temulung agütsütsüba, talilsa, kaketshir aser lanurtem asoshi kanga tongtibang akümer, kechiyong item sentongtem jagi tarutsü lima nung nüngdakba mapatem sayur. Aji oda, taküm linük senotsü sentong nung electronics oset aser electric garitem nung temulung agütsüba tetezüji küm ishika tsüngda asen lima nung ya tanü petrol aser diesel totzü tsüka jajaba garitem ya ajema akümtsü aser electric garitemang teimba akümtsü, anungji tang petrol pump alidak ajak nung electric gari recharge asüdak amenoktsü. Iba jagi tanü lanurtem dang kechi azüngtsüla, kechi mapa indang metettsüla aser kechi mapa inyak angazüksüla, itemji sayur. Kasaji, aluyimba nung temulung agütsütsü asoshi senotsü talila lezmüksüba tetezüji, asenok ajak asoshi mezüng nüngdakbaji chiyongtsü lir, anungji aji meteta asenoki chiyongtsü züsentetba nung temulung agütsütsüla. Tanü alima nung tashitair linüktem US, China, Israel aser Japan ama limatem anüng petinu tashi tutetbaji ali nung aluagi par lima nung nisung ajak chiyongtsü peria akaba agi lir. Aji oda, tapu aika inyaksü bilemyonga kidang chiyongtsü mekara kecha meinyaktettsü. Ibaji meteta, asenok kolok aser shisatsü nung alibatem ajak tangar menepa mapa agi inyaktettsüsa chiyongtsü adokdaktsüba mapa, aluyimba nung government-i temulung agütsütsü ajungshidang, asenoki iba tajangzüki agitsüla aser government nung alirtemia akok tashi budget nung sen peria enoka aliba indang aser itemji amshia inyaksüba sentongtem indang nübortem tonga oagi angateta ashitsüla. Kasaji, kaketshisatsü bushiba nunga, joko alima nung ya mapa ajak Artificial Intelligence (AI) ajanga dang inyak tenzüker asünungji, kakshirtemi angazüksüba mapa tongtibangtibaji AI ajanga inyaksüba mapatem asütsü. Iba atemaji jubilee kilonseria taküm sentong nung kanga süoki ia shia lir. Aji oda, joko asüng lima atema renemba sentongtem nung alima nung akaba rongsentem mesamadaktsüi wazüka ayutsü indang bilemer aser alima tzü moponga kangabo memenendaktsüi asen nüngdak mapa inyaktettsüsa lenmang bushiteptsü ajungshir. Ibayongji, tanü ali mijang aser totzü agi engine arakzükdaktsüba tashi ya anü aser electric nungiang agitsü meranger. Iba jagi, alima tsüka akümba aser zü mopong menenba nungi tuluka kümzüksü. Atangji, asenok tangar ama shishilembar tulu masü aser industry kiburtema masü, iba jagi asenoki küm shia Union budget agütsüba nung terangloka merangloker aser tebilema mebilemdanger, ajisüaka linük nung senotsü sentong yagi asenok ajak dak kongshir. Aji oda, tatsüba agi, senotsü sentong nung soruchiokba gas nung sen tura, iba jagi asenok daka kongshir, anungji itemji metettsü asenok asoshia kanga tongtibang akümer. Alima ya tapi agi alitsüba lima masü, tanü kechi azüng nung aser tanü kechi inyak nung asüng ajangzüksü ta süoki ia bilemstüla, Ibaji küm shia Union budget-i teyur.

OLEMSABANG

TAMADOKBA JALA

~ Temsükala

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Shilem Ti (8)

Aienla jokola küm semer atong nung jokola kibong akümtsü asoshi balala aru saka tebur aika agi lar kibong tia ngua la den kibong akümtsü temulung moulutet. Anungji jokola Aienlai iba timtem nungi adoktsü ta sür alima taginüba aser tejangraba nungi pila ali aser lai sü arba nung tezü metangi meranga inyak .Yamaji tanem tanemi la jokola ajaki meteta kuma lokti nung lar kibonga tagizüktettsü sa akum aser la ajungba indang jembi .Lar kiyonger nungi la akhümtsübo angu.

Tetsüa la dang temulung ajak agi la dak mulung alem aser nüburtemi la jangraa mapa meranga inyakba atema ajaki nükshi. Kenü kiyonger ka Sentila ta sür ka agi Nagaland Staff Selection Board (NSSB) tatitang nung Tailoring instructor post ka adoka lir ta shia agütsüdangang ta la dang shia la agütsütsü ta sür tatidangji agüja la iba nungji takok angü aser la dang Tailoring instructor Kohima nung inyaksü aja. Tetsü aser tenu par kibong rangben lai mesü aser parnok jangratema ali.

Shilem tuko (9)

Küm ana sür kulen ,Aienla tetsü kanga mejungi shirang .Lai tetsü mozü ki nung munga liasü aser dangbo la sorkar mapa tilaka nung lir asü nung sen nung shisabulu mali asü saka iba rongsen jagi tetsü mekümzüktet tetsü süadok.

Tetsü funeral temer kulen lar ki kanga azüngmeyaka akum.Imtiba aser tenu Atuba aser Aienla parnok asem dang anüng .Imtiba akhi ama yi jema seplepa senzü aser teyi dang sen meshili japujari mapa aser yi ajemba nung endoka senzü aser Atuba bo kidang teyi indang sen a auya .Yamaji saka Aienla teti tenu ana meim aser meyima tena atema anogoshia sarasadem .

Jokola la tain akümer asünung lar kiyonger,medemer nungi kibong akumtsü ajongshi saka lai tenu ana iba ama tia nung yutsür ki doktsür mounü.Lai la room taktangi yir kulen lai junga bilemdang. Iba mapang la asoshi tanga yim nungi tebur ka amitsür jabaso ka la den kanga agi tambu ka la den kibong akümtsü asüngdangi aru aser lai khi agi hai ta mashi saka tatsü ka metet pelar dang kibong kümnü , anungji tebursang tena ita tenet tashi kazür külen iba tebursang ya Tsüngrem metetba tebur ka asünung ya ni asoshi tetemsü tebur ka ta lai shitet aser kibong akümtsü asoshi hai haura aka aser tena engagement agi.Tebursang Chubabai Aienla kanga meim aser tena temeim tali züin .Tena temeim kanga ochi liasü aser kati ka dang taoba ta meimtepa aru. Kodang tena kibong akümtsü anogoji atong tetsürla amenba gari accident asü aser la yangji süadok .Chubaba aser tenu Imtiba aser Atuba parnok ajak kanga ajep aser parnok kibong nung mangyim tulu liasü.

Aienla indang funeral nung tenu Imtiba aser Atuba tenati teyi dang tatok meshi aser jokola tena yamai malitsü saka oyala Aien tsüngsü nung alitsü ta teyi mang anasa nangzü.

Otsü Tembang :

Aienla Otsü ajanga asenoki ang tetdi , timtem,tamakok aser tia ajak nung Tsüngrem asen den alir, kechi tia nung lidir teti temulung süa alitsü ajongshir.Shin O agi ashiba agi "Tsürapuri tasen achi nung chirnur tepu mejemer " Atangji iba shin O ya shidak lir.

Tenungsang ken 34:18 "Shir temulung teraksa nung lir, parnok anasa Kibuba lir.Aser tanela nung laoa alir kümzüker".

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Supreme Court-i centre aser states 12 nungi telangzüba meshir



Karnataka Legislative Assembly indang Winter Session mapang benokba 'Anti-Conversion bill' anema longkak aitba sentong ka nung Khristanpur aser parnok bhukumer temi placards amer jajaba noksa nung angur.

New Delhi. Tsüklai/February 02 (Agencies):

State balala nung anti-conversion laws yanglua aliba dak sendakba nung National Council of Churches in India ajanga PIL tasen benokba nung ajemdaker Hombarnü (February 2, 2026) Supreme Court-i Centre aser Rajasthan aser Arunachal Pradesh densema states 12 nungi telangzüba meshir.

National Council of Churches in India (NCCI) tenüng nung senior advocate Meenakshi Arora-isa item State laws mamshi atatsü asüngdanga liasü.

Chief Justice Surya Kant aser Justice Joymalya Bagchi aliba bench kati NCCI ajanga agütsüba züngdang Centre aser State sorkar 12 dang hopta pezü tsüngta telangzüba agütsütsü ashi.

Pleas tasen den ano obendang magütsü aliba tem külemi obendanger asem aliba bench kati jembitsü ta CJI-i ashi.

Centre tenüng nung nokdaker Solicitor General Tushar Mehta-i State laws anema iba mesük petitions lir ta ashi. "Onok telangzüba renema lir aser yakta agütsütsü," ta pai ashi.

Arora-i ashiba agi, Odisha aser Rajasthan nunga parnok ozüng temeja lir aser taoba mapang petitions agüja aliba nung parnok maden. "Danga Acts nung temelenshi lir, aser itemji anema ken o magütsü. Ni parnok ajak nem iba ya agütsüti," ta lai ashi.

"Osang agüjang. Advocate Generals (States indang) nema copy agüjang. Counter affidavit (Centre aser States 12 indang) hopta pezü tsüngta agütsüdakjang. Telangzür nem counter affidavit ka agütsüdakjang. Iba ken o ya tongtipang asünung, obendanger asem aliba bench ka nung agütsüti," ta bench ajanga ashi. NCCI atema counsel ajanga

ashiba agi, State laws kar nung tamangba yimsü melenba anema ken o benoktsü vigilante telok yarir, anungji ken o aika benok.

Solicitor General-i itemji magizük aser item ozüng ya obendanger pongui akumba Supreme Court bench obendang agi awajemer ta ashi.

Centre den ano bench ajanga ajasthan, Uttar Pradesh, Odisha, Chhattisgarh, Arunachal Pradesh, Gujarat, Jharkhand, Uttarakhand, Haryana, Madhya Pradesh, Karnataka, aser Himachal Pradesh nem osang ya agütsü.

September 16, 2025 nung Supreme Court ajanga State balala dang pei state nung anti-conversion laws mamshi atatsü temebishiba ken o metembangi aliba indang osang meshia liasü.

Telangzüba anguba sülen iba amala ozüng mamshi atatsü asüngdanga indang jembitsü ta bench ajanga ashi.

Iba ya state balalai anti-conversion laws yangluba ya constitution den apet asü masü ta benokba petitions indang jembiba liasü.

Iba ken o nung osangtsüsang tajungba nung agiteptsü mechi petitioners atema nodal counsel ama court-i advocate Shrishti shim aser respondent States atema nodal counsel ama advocate Ruchira shim.

Tamangba yimsü balala amangertem kibong akumba mechi tamangba yimsü melenba azüoktsü State laws yangluba anema taoba mapang activist Teesta Setalwad indang NGO Citizens for Justice and Peace ajanga locus standi agütsüba dak sendakba nung Centre-i tasüngdanga agüja lir.

Political interest teshimtet kar mechi NGO-i par tenüng amshidaktsütsü mela, anungji rongrong agi kongshir aliba nüburtem mashi lenmangi ania senotsü jenti bendenba ya tai lir ta Union of India-i ashir.

"Ken o balala jembia aruba nungi petitioner 1-i par tenüng ya par ketdangsür ana ajanga teshimtet political interest kar asoshi amshidaktsü aser iba ama inyakyim nungi sen aazükba angateter," ta Ministry of Home Affairs ajanga ashi.

Supreme Court-i January 6, 2021 nung Uttar Pradesh aser Uttarakhand ama state indang ozüng tasen aser mangatettep aliba ozüng tem kar asadangtsü mulunga agizük.

Uttar Pradesh indang ozüng ya tamangba yimsü balala kibong akumba dak sendakba kisüng masü saka tamangba yimsü ajanga melenba dak kongshir aser ano nisung kari tamangba yimsü danga dangi melentsü mulunga aliba dena lir.

Uttarakhand ozüng yagi tashiyim mesüra mesüzüka tamangba yimsü melendaktsüba nung aibelener küm ana tepuokdak ayutsü shia lir. Mesüzükba ya senotsü, mapa agütsüba mesüra rongsen agütsüba asütsü akok.

NGO ajanga ashiba agi item ozüng yagi Constitution indang Articles 21 aser 25 nung aibelener, kechiaser parnoki State nem nisung ka temeden aser pei mulungba nung yimsü agizükba soittsü tashi agütsür ta ashir.

ANO GO ABEN TSÜNGREM DEN

Tebur junga agizükdak

"Arogotem dang Tanelai kechi ashir, shiba tenarong aten pai angang" J.Adok 3:22

Temeim Techir, Ne o Ni mezüja agizük tashi Kü süngjang agi na süngdaktsütsü. Nai Kü nem ne taküm nung mapa inyakdaktsüra Ni ne taküm ajunga melenshidaktsütsü. Ni na temeimtsü Khristan ka, tepela tembar ka, yimjung senso ka, timtem aremzüker ka, temeim akaba tanishir ka, kiyonger tajung ka, tamang katetba kinüngbo ka, ajemalu kinüngtsü ka, aser peisasa azüokba minister ka kümdaktsütsü (Gal 5:22,23). Junga aliba taküm ka anema kecha tashishitsü mali.

Kü Chir, Ni na ali mapa nunga yariner. Ni ne taküm peria aser junga lidaktsüner. Kodang nai Kü tashi nung metaloka lidir aser Kü shisatsü bushidir, koba mapa nungsa Ni na toktsüdir nai takok angutsü. Na doctor ka süra, Kü teyari ajanga nai tajungba anepalutsü; na engineer ka süra, nai tajungba yanglutsü; na professor ka süra, nai tajungba sayutsü; noksa yanglur, tajungba yanglutsü; aluyimer süra, tajungba tsünütettsü; kinüngtsü ka süra, tajungba meimtsü; student süra, tajungba angazüktsü! Ni Shisatsü Tanela lir, Tangatetba Tanela, Teshisadanger, Tashi aser Temetetba lir (Isa. 11:2). Idakji Ni meyaritetba mapa mali. Saka Ni kechi shiogo Ni tanaben ashir: Nai Kü teyari asüngdangtsüla, agizüktsüla aser metettsüla.

Anepdang shia ne mapa metenzükdang kodang nai Kü jakdang ataa lidir Ni na tashi tasen agi süngtsütsü. Na mapa inyakdak Ni dena alitsü. Alima ajunga nung office, mapa inyakdak aser shishilembaba ajak teraksa agi sünga lir. Balaka asütsü tasü itang. Ni na tashi itdaktsütsü. Na ajanga ni tsüksüji rongtoktsü. Ne dang tuluba aser külem inyaktertem ne dangi tsüngi o atema arutsü kechiaser Ni na shisatsü agi süngdaktsütsü (Lip 41:37-40). Ne dang mejungi inyakra, Kü dangi arung. Ni na taremzüker süngjang agi süngtsütsü. Takokji Ni nungi arur.

Ni na anema pelaa lidaktsüner. Ne temangji asütsü saka taküm lidaktsütsü asoshi Ni idakji alitsü (Rom 8:11). Ne temangji Kü tenla ki lir. Ni ibaji junga lidaktsüner. Iba nung Ni Kü taneptsü ain agütsütsü. Kangki temoatsütemji agizükang. Itemji Ni ne dak inyaktsü. Ni arogoji taneptsü sempet agi süngdaktsü. Kati ka asoshi sarasademjang. Sempettem agi mapa inyakba nai angutsü. Ni na teshisadanga nung junga lidaktsüner.

Kü temeim techir, na Yisu den satitsü aniasünga lir. Pa temeim teka nung na ki matong tashi Ni ne den alitsü. Tanela aser kiyimla ama külemi shidi, Amen! Khrista kilir aser nütsüng asütsü asoshi tenüng züluoker parnok asoshi lir. Tanela Temeshi sempetji shirnok temenen nungi temulung meyipa Khrista Kibur kümdakja pa tashi kübok alir, parnok asoshi lir (T.M. 2:28).

Nüburtemi kodang parnoki jangratemtsü sermon angashir, parnok tenük nungi nüktzü alua angar. Saka parnoki parnok temenen asoshi nüktzü kanga ajema ayimer! Ainkar Isaia aser Yerimia, Yohan Baptistsüba aser Yisu Khrista, Paul aser Barnaba (T.M. 13:11) ama temulung meyiptsü sayutsüngitsü asenoki nüngdaker! Tejen yimya Revival i tejen yimya temulung meyipba aginer! Anema aliba aser rongsenji tanabuba jenjang nung dang. Shirnok tanela nung terenlok mali parnok dang anema aliba aser rongsen indang sayutsüngitsüba masü. Tenyar Yohani ashir, "Temeimba, ne tanela koda renloker, aji oda ajak nung na renlokra aser anema alitsü ni sarasademer" (3Yn 2).



Pope Leo XIV-i Vatican Gardens nung inoka aliba St. Rose of Lima keraklong moatsüba noksa nung angur. Pope Leo XIV-i Peru nübur meimba tepela temaitsü January 31, 2026 nü sentong ka agia Peru nungeri kanga meima aliba St. Rose of Lima indang keraklong ya amenokja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tzüki**

(n) tzü poka yima aliba ayong mali kuma samaba tesem
(point where flowing water vanishes in a river)

* Ali telonglen tapok aliba agi ayong tzüki kuma akonger.

Tzükong

(n) tzü agi meketa aliba tekong (range)

* Ao lima nung tzükong trok lir.



Tir Yimiyim

OLONG PAITEP # 7403

	1		2			3		4		5
6								7		
					8		9			
			10							
11										
				12						
13		14		15						16
17								18		

TIPLIN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7402 TELANGZÜBA**TIPLIN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER

Jain (Deemed to be) University, Kochi ajanga Summit of Future tanabuba shilem ayonga agidang Guinness Book of World Records nung zuluoktsüsa otsü ka yangluogo.

Iba sentong nung "largest relay speech event" ayonga agi aser o jembir 401-i ghonda 10 ser minute 25 nung relay speech jembiteta liasü. Iba relay speech ya anepdang 9:00 ako nungi tenzük aser aonung 7.25 tashi Guinness guidelines kübok agia liasü.

Happy Birthday

TENÜNG : - TENSJUNG LONGKUMTSÜR
TALIDAK : - ARKONG WARD MOKOKCHUNG
KÜM : - 1 (ONE)
TASOBA KÜM : - 03-02-2025

TSÜNGREMER TESÜNGMANGTSÜ TAOCHI AJANGA JALA AJUNGLA KÜM KA TASHI ARISHI MOATSÜ NUNG TEYANGLUR TSÜNGREM NEM TENÜNGSANG TULU AGÜTSÜR, ASER ANO MANENI ARISHI TALANG MOAJA LEN ANIANG TA SARASATEMTSÜR.

~ TEMIEM OBA TAMBU, AMOLA, ODI WAPANG AND ODI YANGER, ARKONG WARD MOKOKCHUNG

**ARTC&S, Sukhovi nung Attestation Parade agiogo**

Dimapur, February 2, 2026

(TYO): January 31, 2026 nü ARTC&S, Sukhovi, Chümukedima nung Assam Rifles Training Centre and School (ARTC&S) indang Attestation Parade agiogo.

Iba sentong ajanga Male aser Female Recruits (GD) tasentem Assam Rifles nung aniokogo.

Mahila recruits 36 dena parnok 282 tashi hopta 44 training agia arur tanü special attestation parade nung shilem agia liasü. Iba parade ya Captain Anjali Kirola lenisüba kübok agi.

Iba training nung battle craft, weapon handling, jungle lane shooting, aser specialisation in counter-insurgency operations dena liasü.

Maj. Gen JS Bainsla, SM, Additional Director General of Assam Rifles-i o jembidang Assam Rifles indang senmang akaba aser linük nung paramilitary force tejentiba indang lemsatp.

2015 nungi Rifle women anioktsü tenzük North East nung dang masü saka Jammu & Kashmir, United Nations

Missions nung shilem tajung agia arur. Maneni tetsürtemi 2019 aser 2023 Republic Day Parades nunga shilem tajung agiogo ta Maj. Gen JS Bainsla-isa ashi.

Tanü sentong nung tsünglanglen agüja alir nem sempettem agütsü:

Overall Best Recruit (Best in Physical & Firing) GD: Appu Chakma;

Overall Second Best Recruit by GD (Mahila): T. Maloti Devi;

Best in Drill: GD Bikash Mandal.

Tripura nung Bangladeshi nunger 3 den India senso 2 apu

Agartala, February 2, 2026

(Agencies): Tripura Police-i Unakoti district kübok Kailashahar nung Deobarnü Bangladeshi nunger asem aser Indian touts ana puogo.

Osang tejangja ka angazükba nung ajemdaker police-i mita aodang parnok pungu apu. Parnok ya ozüing alema India telungi ait aser Chennai-i aotsü merandang apu.

"Paiturbazar New Motor Stand area nung police telok kati

mita anük dang Maruti van gari ka nung nisung pungu aruba nung taitü ajitet. Parnok ya Dharmanagar ajanga Chennai-i aotsüba liasü" ta Kailashahar Police Station Officer-in-Charge Tapas Malakar-i ashi.

"Police-i gariji soter asüngdangya asü dang parnoki otsü balala ashi. Iba jagi jungjunga asüngdangya asü dang nisung asemji Arman Hossain, Imran Hossain aser Monir Hossain aser parnok ya

Bangladesh kübok Comilla district nung alir ta nangzüka liasü" ta Malakar-isa ashi.

Parnoki Bangladesh arrtsü adener ozüing alema India telungi aitba nangzükogo ta paisa shisem.

Tanüngba nisung anaji Rangauti area nung alir Faruk Mia aser Abdul Qayyum na ta jangjaogo aser tenati ozüing alema aitdaksüba aser Chennai-i aotsü anepaluba atema tai tonglokja apu.

Indo-China arrtsü anasa Idu Mishmi nungeri Reh benjung amung

Itanagar, February 1, 2026

(Agencies): Arunachal Pradesh nung Idu Mishmi nungeri Reh benjung kanga takok ngua mungogo. Indo-China arrtsü anasa Dibang Valley district kübok Anini nung parnoki benjung amung.

Iba sentong nung Chief Minister Pema Khandu, tongti minister tem aser lokti lennirtem aden.

Dibang Valley aser Lower Dibang Valley nung alir Idu Mishmi kin atema Reh benjung ya kanga tongtipang lir. Iba benjung ya tetsü tsüngrem Nanyi Inyitaya nungi yimjung, azükaru aser kin ajunga junga lidaktsütsü temoatsü meshia amunger.

Taküm benjung ya February 1 nungi February 3 tashi amunger aser Dibang o Lower Dibang Valleys nung külemküjaba inyaker.

Idu Mishmi nungeri Anini aser Roing nung tongti süa iba benjung amunger.

Chief Minister Pema Khandu den Deputy Chief Minister Chowna Mein, Arunachal East MP Tapir Gao, Sports Minister Kento Jini, Women and Child Development



Minister Dasanglu Pul, IPR Minister Nyato Dukam, aser MLA Mope Mihu nungeri benjung nung aden.

"Idu Mishmi nungeri oshi, inyaksangshi aser sobaliba maitsü kümzüka ayutsü ayongzüker. Asen sobaliba wazüka ayutsüba ya tarutsü pututem asoshi dang masü saka alimai Arunachal senmang angatetsü asoshi kanga tongtipang lir" ta CM Khandu-i ashi.

MP Tapir Gao-ia Reh salem lemsatp aser Anini ya tourism destination ka ama ajungkettsü ayongzüker.

"Taküm Reh benjung ya balaka lir kechiyong tesüba mapang lenmang majungba agi kinungertemi külemi adenshir memungtet. Ajisüaka takümbo kinungertem tesem ka nung adenshir aser Indo-China arrtsü anasa benjung külemi amunger" ta local MLA Mope Mihu-ia ashi.

Bangladesh taoba lenir Hasina küm 10 tepuokdak ayutsü obendang agütsü

Dhaka, Tsüklai/February 02 (Agencies): Hombarnü Bangladesh nung aliba court kati taoba ato kilonser Sheikh Hasina küm ter tepuokdak ayutsü aser lar kinunger British nung ozüing yanglur Tulip Siddiq küm pezü tepuokdak ayutsü obendang agütsüogo. Ibai linük yimtiba anasa sorkar indang township project ka dak sendakba ken o ana nung obendang agütsüba alitsü.

Special Judge's Court-4 indang obendanger Mohammede Rabiul Alam-isa ano Hasina'er kinunger Azmina Siddiq aser Radwan Mujib Siddiq na küm tenet tepuokdak ayutsü obendang agüja liasü.

Linük indang corruption watchdog ajanga ken o benokba nung Hasina-i sorkar ketdangsürtem den teka amteper Dhaka anasa Purbachal New Town Project

nung la aser lar kinunger asoshi ali kimong trok tashi ozüing alema agia liasü ta tai tonglokja liasü.

Nobel Peace Prize angur Muhammad Yunus tekolak sür aliba interim government-i February 12 nü elections agitsü renemshiba mapang iba obendang ya agütsü. Hasina indang Awami League party iba election nung shilem magidaktsür.

Hasina aser Tulip Siddiq ya taoba mapang ano iba mesük ken o nung aija lir. Siddiq-i tetsütanutsüi küm 15 tashi yimsü asüba mapang la Bangladesh senso masü asünung sorkar nungi ali magi ta ashir. Ajisiüaka prosecution-i ashiba agi, la tetsü aser adianu ana nem iba project nungi ali agütsüdaktsütsü asoshi lai tetsütanutsü ajungmeso, koba lai khenyongi magizüker.

Hasina ya ano iba project

nung ochimashi ken o pezü nunga aija lir, shibai tim masüba nung tashi ta ashir. Item ken o nung court-i la nem ajak meyokteper tepuokdak küm 26 ayutsü obendang agüja lir, aser lar jabaso Sajeeb Wazed aser jala Saima Wazed küm pongu- ngu tepuokdak ayutsü obendang agüja lir. Hasina tenu tanutsüla Sheikh Rehana ya küm tenet tepuokdak ayutsü obendang agütsü. Parnok ajak tang bendang lima nung lir. Tulip Siddiq ya UK nung alir.

Kaketshir temi anir sorkar anema longkak aitba mechi Hasina ya August 5, 2024 nü India-i jena oa yangji alir. Iba longkak aitba mapang nisung noklang aika tepsetba mechi la nem tasüba temerenshi agütsütsü obendang agüja lir.

Bangladesh-i Hasina anir arutsü asüingdangba nung India-i telangzüba agüja mali.

Pakistan nunger sepaitemi Balochistan nung telungpur 145 tepset

Islamabad, Tsüklai/February 2 (Agencies): Balochistan province nung telungpurtemi nisung 50 dak tema tepsetba sülen Pakistan security force temi iba province nung telungpurtem meita aoba mapang parnok 145 tepsetogo.

Honibarnü southwestern Balochistan nung tesem balala maka tetsür pongu densema civilian 31 aser security personnel 17 tepsetba sülen iba osang ya Deobarnü sangdonga liasü.

Tesem balala amakba ya Balochistan Liberation Army (BLA)-i nangzükogo. Lendong atalokba sülen ketdangsürtemi ita tepeyong atema security dak sendakba nung tenokdangba kar agütsüogo, kong lokti madenshitsü, longkak aitba sentongtem ayongzüka magitsü aser gari senzüsensongtsü atema tenokdangba agütsüba densema lir.

Tenokdangba agütsüba nung

lokti adenshiba tesemtem nung tejak meyibangtsü memelaba densema lir, ta Dawn osang kaket ajanga metetdaktsü.

Province chief minister Sarfraz Bugti-i Quetta nung osangbenertem dang ashiba agi, sepaitemi kanga kara telangzüba agüja "Fitna al-Hindustan," züngsem 145 tepsetogo.

Küm aika lir tang mezüingbuba taoba anogo ana tsüingda telungpurtem aika tepsetogo, ta paisa shisem.

"Sepaitemi tepsetba kiralongrartem indang tasü mang onok ket nung lir aser parnok rongnung karbo Afghanistan nunger lir," ta Bugti-i ashi. Paisa, India-i teyari agütsüba kiralongrartem hostage tem pur onüa liasü, saka parnok yimti teyong tonga marutet, ta ashi.

Pakistan military-i ashiba agi, telungpur 92 Honibarnü tepset aser Hokolbarnü 41 tepseta liasü.

Gaza nung Rafah crossing lapoktsüogo



Cairo, Tsüklai/February 2 (Agencies): Gaza nung kanga dang tongtibang Rafah arrtsü crossing ajanga gari kar senzüdaktsütsü asoshi lapoktsüogo. Küm anashi shibanga ayuba sülen iba crossing lapokogo, ta ketdangsürtemi metetdaktsü.

Iba crossing yagi Gaza aser Egypt na sendakteptsür aser Gaza asoshi Israel madeni alima den sendaktepa crosing iba kija ya dang lir. Crossing ya Hombarnü lapoktsüogo.

United States teyongtsüi ia benokba ceasefire koba ajanga Israel aser Hamas na October ita rara anena liasü, iba tenangzüktepbba kübok crossing lapoktsü asoshi telemtetba agia liasü. Iba lenmang ya humanitarian supply tem Gaza-i bener aitsü aser temang anepalutsü atema bendangleni aotsü alirtem asoshi kanga tongtibang lenmang lir.

Ajisüaka talenba ka lirang iba crossing lapoktsüogo. Israel aser Egypt nati iba crossing ajanga nisung telatet ka dang senzüdaktsütsü imlar aser Israel-i Gaza-i aiter aser tugurtem kanga junga asadangba sülenang yoktsü.

Israel nunger security

ketdangsür kati ashiba agi, European monitoring team tem crossing tongogo, ta Reuters news agency-i metetdaktsü.

European Union Border Assistance Mission (EUBAM)-i Palestine tsütsü crossing ya achaaayangtsü, shirnoki Gaza toktsür aotsü asoshi janrgartem indang list ka benoktsü.

Kasaji Egypt-ia Palestine nungertem Gaza-i aitsü janrgartem tenüing benoktsü. Parnok ya security screening ka sülen anogo ka lirang aitsü asoshi temelaba agütsütsü, ta Israel nung media sangdong balala ajanga metetdaktsü.

Egypt nunger ketdangsür kati ashiba agi, crossing lapoker mezüingbuba anogo Palestine nunger 50 tugutsü aser 50 aitsü asoshi temelaba agütsütsü, ta Associated Press news agency-i metetdaktsü.

Israel army-i Rafah crossing anasa parnoki azüoker aliba tesem nung checkpoint ka amenokogo. Iba checkpoint ya Egypt nungi Gaza-i aitba Palestine nungertem asadangtsü atema lir, ta Times of Israel daily-i metetdaktsü.

Iba checkpoint nung aliba sepaitemi, Israeli intelligence

agencies-i agizükba list anema arurtem maitsü jangjatsü atema jenjang agitsü aser item nisungtemi bener aruba khutem ajak kanga junga asadangtsü.

Gaza nung rara tenzükba sülen ita teku shi lir Israel-i 2024 küm May ita Rafah crossing ya atsüing aser iba ajanga Palestine nunger yirur alirtem aser shirangertem Gaza adena temang anepalutsü atema anir aotsüpurtem asoshi lenmang tongtibangtiba nokdanga liasü.

Iran-i US den nuclear keno jembitsü totuyuba agütsü

Tehran, Tsüklai/February 02 (Agencies): Iran Tir Masoud Pezeshkian-i United States den nuclear keno jembitenzüktsü totuyuba agütsüogo ta sorkar osang ka ajanga Hombarnü ashi.

"Iran aser United States nuclear file indang jembishinü akatsü," ta Fars news agency ajanga ashi saka anogo ka tejangja mashi. Iba osang ya sorkar indang osangkaket aser reformist osangkaket Shargh nunga adoka liasü.

US-i amak nungbo regional war ka tenzüktsü ya Iran supreme leader-i tekum dangtsü ashiba sülen US Tir Donald Trump-i Iran den tezüngzüktepbba ka yanglutsü imlar ta shir anogo ka lir iba osang ya angazüker.

Iran leniri tekum dangtsü ashiba indang asüingdang dang, "Asenok tezüngzüktepbba ka yanglutsü imlar. Asenoki tezüngzüktepbba ka meyanglura, pa shidak asü masüar asenoki bushitettsü," ta Trump-i langzü.

December ita tatemlen nungi taoba ita tashi sorkar anema longkak aitba nung Iran sorkari tashiyim amshiba sülen linük ana tsüingta mangatettepbba kanga mejungi akum. Trump-i mitkar tashi amshitsü amokmerena aru aser Middle East leni aircraft

carrier group yoktsü totuyuba agütsü.

Hombarnü Iranian Foreign Ministry odongtar Esmaeil Baghaei-i, US den tesendaktep mejungi aliba ketdang asütsü atema Tehran-i lenmang balala asadangtar aser anogo ishika tsüingta results angutsü imlar, ta ashi.

"Region nung aliba linük temi osang belentepba nung yariteper. Onük balala lemsatepogo aser inyakyim ajunga kanga junga asadanga telemtetba agitar," ta Baghaei-i ashi.

Iran nung sen tashi mait akumba ajanga longkak ait tenzük saka sorkar anema akum, koba US aser Israel-i tushiba nungi adok, ta Tehran-i ashir. Ketdangsür temia iba mapang nisung meyerijang aika süogo ta ashir.

Deobarnü Iran tir indang office ajanga nisung 3,117 asüba nungi nisung 2,986 indang tenüing sangdonga liasü. Item rongnung nisung 131 mejangjateter, saka yakta sangdongtsü.

Ajisüaka US nung aliba Human Rights Activists News Agency-ibo nisung 6,842 asü aser parnok timba longkak aitertem lir ta ashir.



Khartoum, Feb. 2 : Khartoum, Sudan nung aliba Khartoum International Airport nung Sudan Airways passenger plane ka nungi passenger tem aludang tangokba noksa nung angur. Küm asem jungnüa lir tang mezüingbuba commercial passenger tayimtsü ya Deobarnü Khartoum International Airport tonga aru, koba mapang talangka shibanga lir Sudan yimtiba nung airport tanaben lapokba nung tongtipang mera ka liasü. Iba tayimtsü ya Sudan Airways meyong lir, kong passenger 160 mener Sudan anüdoklen Port Sudan nungi arua liasü.

Pakistan-i World Cup nung India den masayatsü telemtetba agi

Tsüklai/February 2, 2026

(Agencies): Salman Agha-i aniba team T20 World Cup 2026 nung asayatsü atema Sri Lanka-i aotsü asoshi Pakistan sorkari temelaba agütsüogo. Ajisüaka Pakistan team February 15 nü Colombo nung India den masayatsü telemtetba agiogo.

Bangladesh team iba asayamung nung masayadaksütsü telemtetba agiba sülen Pakistan Cricket Board (PCB)-i iba inyakyim ya tim masü ta shia parnoka iba asayamung nung atsüngingtsü ta amokmerena aruogo.

Pakistan-i T20 World Cup 2026 nung masayatsü telemtetba agira parnok nem ICC-i tenokdangba aika agütsütsü liasü, kong bilateral series tem nung shilem magidaksütsüba, ICC asayamung tem ayongzüka masayatetsüba aser asayamung nung parnok

melen Bangladesh shimtsüba densema liasü. ICC-isa, iba amala jenjang agiba ajanga Pakistan nung cricket asaya tarutsü dak kanga mejungi kongshitsü ta shiogo.

Pakistan sorkar indang official X handle ajanga, "Government of the Islamic Republic of Pakistan-i Pakistan Cricket Team ICC World T20 2026 nung asayatsü temelaba agütsüogo, Ajisüaka Pakistan Cricket Team India den February 15 nü asayatsü aliba asaya nung shilem magitsü," ta metetdaksü.

Team ya India den masayatsü saka asayamung nung shilem magitsü atemabo telemtetba magi ta kasa sangdong ajanga metedaksüogo. ICC inyakyim anema Pakistan sorkari par team India den masayadaksütsü asoshi telemtetba agiogo, ta Geo News sangdong ka ajanga

metetdaksü.

Security dak sendakba nung India-i oa asayatsü asoshi tetsükdaksü lir ta shia Bangladesh-i ICC dang parnok asaya Sri Lanka-i belener aotsü asoshi mepeshiba magizükba ya tim masü, ta Pakistan nunger ketdangsürtemi bilemer.

ICC-i Bangladesh ken o junga achaayang masüba agi Pakista sorkar kübok temaba jenjang nung aliba ketdangsürtem mepelar aser ibayongji India den masayatsü telemtetba agiogo. February 15 nü Pakistan team masayara Suryakumar Yadav-i aniba team nem point ana agütsütsü.

Kasa mapang nung India den masayara Pakistan nem ICC-i tenokdangba agütsütsü ana nung lir, kechiyong ICC, PCB, aser BCCI nunger mulungtepba ama asaya ya neutral venue (Sri Lanka) ka nung asayatsü liasü.

Hazlewood T20 World Cup tetenzüklen masayatetsü



Tsüklai/February 2, 2026

(Agencies): Pakistan den T20I asayamung nung shilem magitetba sülen Australia nunger seamer Josh Hazlewood T20 World Cup tetenzüklen masayatetsü akok, koba February 7 nü tenzüktsü. Hazlewood yiruba junga taneptsü mongui aliba mapang ka nung Australia-i cover ama Sean Abbott shimogo.

Mitchell Starc T20 asaya nungi anisüngzüka den Pat Cummins yirur T20 World Cup masayatetsüsa kümer aliba mapang tang Hazlewood-a

temang tajungba makümba ajanga Australia nem tetsükdaksü agütsüogo. National selector Tony Dodemaide-i ashiba agi, Hazlewood ya Hombarnü Colombo nung team den longjemtsü liasü, saka pa Sydney nung dang lir, kong pa maneni temang anepalutsü.

"Nathan, Tim aser Glenn nunger Colombo tonga aruogo aser onok Pakistan nungi aoba sülen parnok den ajuruteptsü yongya atar. Josh atema Sri Lanka-i mao tsüngda pa kidang maneni temang anepaluba

tajungba asütsü ta bilemer," ta Dodemaide-i ashi.

Cummins melen Ben Dwarshuis shimogo aser tang Hazlewood indang cover ama Abbott shimtsüsa kümogo. Nathan Ellis-a yirur aliba nungi meyipa aruogo.

"Nathan-a meyipa aruogo aser onoki fast bowling cover ama Sean anir arutsü telemtetba agiogo. Sean ya takok tajung anguba international asayar ka lir, aser pa World Cup aika nung tajangshiba bena aliba asayar ka lir," ta Dodermaide-i shisem. Kasa mapang nung Australia team ano Adam Zampa-a yirur aliba ajanga timtem nung lir. Leg-spinner ya groin yiruba ajanga Lahore nung Deobarnü Pakistan den tatembangbuba T20I asayaba mapang batting mamen.

Batting nunga Tim David Super 8 stage nungibo asayatetsü imla atadar, shiba hamstring yiruba ajanga Big Bash nung masayatetti liasü.

Svitolina aser Belinda nati WTA aotsü tasen kayangluogo



Tsüklai/February 2, 2026

(Agencies): Belinda Bencic aser Elina Svitolina nati WTA Tour nung otsü tasen ka yangluogo.

Puti otsü nung tang mezüngbuba tanur tetsü ana mapang ka nung WTA Top 10-i iogo.

Switzerland tsür Bencic, January tom nung Top 10-i ai. La jala Bella soa bentsütsü atema 2023 September ita asaya nungi anena ataba sülen tang mezüngbuba Top 10-i iogo.

Iba sülen hopta ka dang lir la den ano Ukraine tsür Svitolina-a Hombarnü sayaba rankings nung Top 10-i iogo.

"Maternity leave agiba sülen küm ka lir WTA Top 10-i aiba atema ni kanga nema adanger," ta Bencic-i ashi. "Iba jenjang ya nisung ishikati dang ajangzükteta lir aser ya ajangzüksü asoshi koda tasak

ajia kari dang meteta lir," ta laisa shisem. Iba alizüng tongtetba atema lai lar kibong aser team nem tenünsang agüja liasü.

Svitolina-ia, "WTA Top 10-i meyipa aruba ya nükjiding tongtetba ka lir aser tetsü ka ama iba alizüng tongtetba ya kü atema kanga tongtibang lir. Ni meranga raraba aser tetsükdaksütem ajak kokteta aoba atema kanga nema adanger," ta ashi.

Asayar anapronglai WTA Tour indang Special Ranking Rule amshiogo, koba tanur tetsürtem temaba jenjang nung tetoktepbai tanaben aitsü atema yanglutsüba lir.

Australian Open nung Bencic bo tanabuba round nung tsükatok, saka Svitolina-ibo kanga junga asayaogo. La semifinals tonga asaya, saka world No.1 Aryna Sabalenka-i 6-2, 6-3 agi tsükdakja liasü.

Bengaluru FC asayartemi taah ajemer agitsü mulunga agizükogo

Tsüklai/February 2, 2026

(Agencies): Bengaluru FC kibur Parth Jindal-i Deobarnü ashiba agi, nüngtugu asayar Sunil Chhetri densema first team asayartemi taruba Indian Super League (ISL) season atema taah ajemer agitsü mulunga agizükogo. Iba asayamung ya February 14 nü tenzüktsü.

"Indian Football tang timtem nung aliba ajaki meteta lir. Kü atemabo BFC team kibur aser iba asaya aser club kanga meimba nisung ka ama kü taküm nung tang ya tasaktiba mapang ka lir," ta Jindal-i X nung zülutsü.

"First team asayartemi taah ajemer agitsü atema mulunga agizükba atema kanga pelar. Club ka ama iba telemtetba agitsü ya ajak dang tasaktiba liasü aser club aser iba asaya ajangzükdaksütsü atema asayartemi iba jenjang agiba atema kanga pelar," ta pai shisem.

Taoba ita ISL club FC Goa-ia, captain Sandesh Jhingan

densema parnok asayar aser support staff temi taah ajemer agitsü mulunga agizükba sangdonga liasü.

X nung post ka ajanga Goa nung amendaker aliba club yagi ashiba agi, league tia tensa mejangjai aliba mapang asayar aser staff tem den kang dang sensaksem tasak ka ayongzüka agia liasü.

"Indian football tia tensa mejangjai aliba mapang ozü club sensaksem tongtibang ka agia liasü. Onok indang first team asayartem aser technical staff temi taah ajemer agitsü telemtetba agia liasü," ta club sangdong ka ajanga metetdaksü.

AIFF Super Cup champion club yagi ashiba agi, asayar aser staff temi iba jenjang agiba atema kanga pelar. "Iba amala mapangtem ajanga club ya ground telung nung asayaba kija masü ta sayur. Iba ya nüburtem, tamangba aser nüngdakba mapang longjemer nokdakba indang lir," ta FC Goa-i ashi.



NFL football Super Bowl LX matong tsüngda New England Patriots nungi asayartem San Jose nung Mineta International tonga aruba noksa nung angur. New England Patriots aser Seattle Seahawks na February 9 nü Levi's Stadium, Santa Clara nung asayatsü.

BILEMDANGANG

"Nisung ajaki ajanga aotsüba süngküm ka lir; ibaji tasüba."